

৭৮
৪/১০/২০০৭

লংলৈই

বিষ্ণুপ্ৰিয়া মণিপুৰী ৱাইটাৰ্স ফৰামৰ মুখপত্ৰহান



সম্পাদনা

নৱেন্দ্ৰ কুমাৰ সিংহ

ৰামলাল সিংহ

সন্তোষ সিংহ

লংলেই

বিশ্বপ্ৰিয়া মণিপুৰী ৱাইটাৰ্স ফৰামৰ মুখপত্ৰহান
প্ৰস্তাবনা সংখ্যা

পইলা বসৱ, পইলা সংখ্যা

৪ অক্টোবৰ, ২০০৯

1st Year, Vol-1

4th Oct, 2009

সম্পাদনা

নৱেন্দ্ৰ কুমাৰ সিংহ

ৰামলাল সিংহ

সন্তোষ সিংহ

Published by

Pratibha Sinha

e-mail

imsantosh2008@yahoo.com

Cell : +919435625171

Price

Rs. 10/- only

কাৱ কাৱ ইকাৱা আসে—

প্ৰবন্ধ

সন্তোষ সিংহ

কবিতা

দিল্লী লক্ষীন্দৰ সিংহ

বিমলেশ সিংহ

শশীকুমাৰ সিংহ

কাঞ্চনবৰণ সিংহ

নৱেন্দ্ৰ ঠাকুৰ

ৰামলাল সিংহ

ৰামেন্দ্ৰ সিংহ

সুজিত সিংহ

ব্ৰজগোপাল সিংহ

শ্ৰীধাৰ সিংহ

সন্তোষ সিংহ

হৰেন্দ্ৰ সিংহ

মৃণালকান্তি সিংহ

বীৰেশ ৰঞ্জন সিংহ

সঞ্জীৱ সিংহ

সমৰ সিংহ

বিশ্বপ্ৰসাদ সিংহ

লেহাউ সেনা সিংহ

Printed by

M/s SMJ Enterprise & Printers

Jayanagar, Sixmile, Guwahati-22

Cell: +919864106334

সভাপতির নুংশিপা কথা আকটুটি,

মি য়াম হারৌ অইলু যে বিষ্ণুপ্রিয়া মণিপুরী রাইটার্স ফরামে জরম অয়াউ বিষ্ণুপ্রিয়া মণিপুরী ভাষা মিমাঙে আনিয়া মিঙাল-পাছা করিয়া তুলানির সালেদে হবা হবা কাকেই কারে পারেসে। কতদিন আগে কবি সম্মেলন করিয়া কবিতা পাকরানি, অরানির মাধ্যমে নুবা নুবা লেংপা বারো কবির ইকরানির হৎনাহানরে বাখান জানেয়া, তানুর রিদির বিতরর সৃষ্টিশীল মানু উগরে হজাগ করানির পালাহান অকরানিয়ে সমাজর কোনে কাঞ্চেলেন্ত এহান স্বাগত জানেয়া ইমাঠার বানাপাকুরা, সৃষ্টিশীল বারো সংবেদনশীল মানু আত তুলেসি।

এগদে বারো ইউনেস্কর প্রতিবেদনে মাতেসি বিশ্বর ছয় লিগিঙর চুবা ঠার মিমুত অনার পথে সালসে। ২০৫০ সনর বিতরে পুন্মাপ ৬৯০০হান ঠাররমা খেইপক আহান অর্থাৎ ৩৪৫০হান মিমুত অইতে। গেলগা মারি আইল অফ মেনর লাম উহানর “মেনস্ক”, তুরস্কর “ইউরিন” বারো আলাস্কার “ইয়াক” বুলতারা ঠার উহানির বর্জিগ সুপ নিবিল। মিমুংপা ঠারর সংখ্যা ভারতে হাবিস্ত য়াম। থাংনাত আমেরিকা বারো তার থাংনাত ইন্দোনেশিয়া। ভারতর উত্তর-পূর্বাঞ্চলে ৯হান ঠার এবাকা পেয়া সুপ লিম মাইঙল। উতার গজে আরাকৌ কতরতা ঠার তেল্লাম মিমুত অনার অংতাত আয়া ফবসেগা। ঠার এতারে মিমুং অনা নাদানিরকা বুলিয়া ডাঙর কর্মযজ্ঞ আগ হাঞ্জানির সিজিল চলেসে। আমার রাজ্যহান অসমে ১৩হান ঠাররে আপংপা ঠারর লিট্রিমা যৌকরেসি। উতারমা বিষ্ণুপ্রিয়া মণিপুরী ঠার এহান না যবসে যদিও, আমি ঠারহানর অংতাহানর বেদে চেয়া, য়াম ব্যাখ্যার বেদে নাগিয়া, টাংখেই সেঙয়া মাতে পারিয়ার যে এরে শতাব্দী এহানর বিতরে নুংশি ঠার এহান মিমুত অইতে হাটক নেই। উতার গজে সরকার গিরকে ঠার এহানরে সংবিধান প্রদত্ত অধিকারেন্ত বঞ্চিত থয়া, কল্যানকামী রাষ্ট্র আহানর দায়িত্ব নকতি আহানৌ পালন নাকরের। ভাষা এহানর বিকাশর সালে খানিয়ারা পাংলাক আহান পেয়া করানি হাংকৈ অয়া সরকারে ভাষাহানরে ঠই ডুকডুকা অংতাং বেলা দিয়া কুমেই চেয়া বয়া আসে।

এরে অংতাং গুৱাহাটী মহানগরীর সাদে বহুভাষিক সমাজ আহানর অংশীদার অয়া, গোলকীকরনর জাতা-চিপাগং হমেয়া, মিডিয়া-লাঙ্কিত বলিউডী দুকাসালা সংস্কৃতির জাতাই নিংখা ডিফিয়া থায়াউ কতগ আহান কনাক লেঙর সমাজনিংপা, ঠার-নিংপা গাউরাপা-পুড়িজেলেই ফরাম এগর মাধ্যমে নিজর ঠারে ইকরানির বামাল চৌহাং অয়া থেঙসি এহান বাখান নাকরিয়া নাকরি। উতার গজে

৪ অক্টোবৰ ২০০৯ ইং মহানগৰীৰ বুকগং হাঙ্গাসি সেমিনাৰ-কাম-বৰ্কশপ এগ (Challenges Before the Minor Languages of Assam) ৰ সময়-ইল্লা আৰৈপা কামহান বুলিয়া হাৰপাকুৰা বৌপাকুৰা মানুৰে সলকরতারা। দল আগ গিরিগিথানীয়ে পাংলাকর আতহান সালকরেসি। মি ঔ গিরিগিথানী উতার লগে ফরামর হাবি সদস্য গিরিগিথানীয়ে রিদিয়ৌপা থাকাত জানাউরি।

হাবিস্ত ডাঙর য়ারিহান অমাটিক কম দিনে হাবির কামর গঞ্চালর হাদিতৌ 'লংলেই' মুখপত্ৰহান হাজেয়া নিকলানির যে হেইনাহান ফরামর সদস্য গিরিগিথানীরাং দেছরি এহানাং "ফালো ফালো " বুলিয়া পেরেম নাকরিয়া নারুরি। আশা ধৌরি লংলেইর করাল রূপ উহানর হাদিত তুল তুল করেर সৃষ্টিশীল প্রেমর ধারা উহান পাঠকে বারো সমাজ-নিংপা মানুৰে উপনি পারতাই। সমাজ এহান সৈনায়্য ফরাম এগরে পেরেমল কলকরিয়া ধরানিরকা উবুরিগ অইতাই বুলিয়া মি ডাটয়া মাতে পারুরি।

গুৱাহাটী

০১-১০-২০০৯ ইং

দিল্‌স লক্ষ্মীজি সিংহ

সভাপতি

বিস্মুপ্রিয়া মণিপুরী ৱাইটাস ফরাম।

আমার চাৰিয়বাবাদে চেইক, নুংশিপা ইমাঠাৰে জিংতা করানিরকা সংবেদনশীল, সচেতন মানুৰে খালকরাং থেঙসি, কর্মপস্থা মুঙে থয়া কাম করাত লাগেসি। আমার এৰে রাজ্য এহানাং অসমিয়া, বাঙালি, বাভা, বড়ো, মিসিং প্রায় হাবি জনগোষ্ঠীয়ে তেতনেই হংনা করিয়া সালসি। বিষ্ণুপ্ৰিয়া মণিপুৰী ঠাৰহান টটরতারা মানু এতাও নুংশিপা ইমাঠাৰ এহানৰে হুদা জিংতা করিয়া থনারকা নাগই প্রাতিষ্ঠানিক মৰ্যাদা পৰানিরকা, ঠাৰএহানল এলা দেনারকা, নাপাল করিল সাহিত্য, মনন চিন্তাৰ মাধ্যম আহানক' তুলিয়া ধরানিরকা সাংগঠনিক কাম-দুমল, সাহিত্য-সংস্কৃতি চৰ্চাল ঐতিহাসিক ভূমিকা থয়া গেসিগা। যিতারাগা এবাকাও। গুৰাহাটিৰ সাদে বহুভাষিক পৰিবেশ আহানাত যে কুনো কুস্তিরাং ঠাৰ আহান পালয়া জিংতায়া থানা উহান ডাঙৰ চ্যালেঞ্জ আহান। যদি নুৰা তেংকলে ঠাৰ ঔহান টটরা নারতারা, ঔ ঠাৰে সাহিত্য চৰ্চা নাকরতারা উতাইলে ঔ চ্যালেঞ্জ উহান কিসাদে মুকাবিলা করানি পারতাঙাইতা?

এসাদে টেংঠাং গৌহাটি মহানগরৰ বুকগত বিষ্ণুপ্ৰিয়া মণিপুৰী রাইটার্স ফরামৰ জৰম অনি এহান ঐতিহাসিক কাকেই আহান। ঠাৰহানৰে বানাপেয়া, ঠাৰহানৰ মিঙাল পান্না মূৰ্তিগ হাবিৰ মুঙে হাজেয়া তুলানিরকা, আত্মমৰ্যাদাল মূৰ তুলিয়া ইমাঠাৰহান টটরানিরকা, এ ঠাৰে সাহিত্য চৰ্চা করানিকা নুৰা তেংকলৰে ধৌতাল দেনি ঔহান ফরামগর উদ্দেশ্যহান।

এ উদ্দেশ্যৰে মুঙে থয়া ফরামৰ মুখপত্ৰহান 'লংলেই'ৰ পইলা মারলগ ফটোল। ফরামৰ পৌ, কাম-দুম বারো ইকরা ইকরিল, সময়ে সময়ে লংলেই ফঙইতই। রাইটার্স ফরামৰ পৌ পেইতাঙাই www.bishnupriyamanipuri.com বেবসাইটগং। লেংপালকেইরাংত চিন্তাশীল প্ৰবন্ধ, কবিতা, য়াৰি বারো পাংকাল পেইতাঙাই আশাল আমার মিশনহান অকরলাং। কম সমেইরমা পত্ৰিকাহান নিকাললাং থাংতে নিয়ামপারা লেংপালকেইৰ তুলো যোগাযোগ করে নারলাং। পিসেকার সংখ্যা ঔতাত ঔ গিরিগিথানিৰ ইকরা থইতাঙাই। বারো যে সমাজ নিংপা, সাহিত্য-সংস্কৃতিপ্ৰেমী গিরিগিথানিয়ে ধন সাম্পালল আমাৰে সেংকা দিলা তানুৰাং থাইল পুন্নিংয়ৌপা ভক্তি।

লংলেইৰ মুজুৰাগই সমাজৰ বিতৰে চলেসে দলাদলিৰ পৰল্লেই ঘটগ সুমঠিগ করক। আনিয়াআহক নুৰা সৃষ্টিৰ বরগজুরি। আমার মিশন এহানাং হাবিহান সাম দিক।

বিষ্ণুপ্রিয়া মনিপুরী টোটেম : নৃতাত্ত্বিক পাঠ আকচুটি
(Bishnupriya Manipuri Totem : An anthropological study)
সন্তোষ সিংহ

নৃতত্ত্ব এহান মানব বিজ্ঞানহান। সমাজবিজ্ঞানর তিনহান আধুনিক বিদ্যা-ডেঙরমা আহান। মানু আগর পুন্নাপ পরিচয় দেনার হুমা করের নৃতত্ত্বই। মানু এগ লৌশিংপা উন্নত আকখুলা জীবগ হুদা নাগই। মানু আগর লগে সুপয়া থার থেইকরে নারিল পরিবেশ আহান, লগে থার লু সম্ভাআহানও। উপ পারিল-নারিল বিচিত্র পরিবেশ বারো ঔ পরিবেশে মানুর জরম অনি, ডিগল-ডাঙর অনি-মানুর বিকাশর এ হুতগর জিরণ নেই, পারম্পর্যপূর্ণ, যুক্তিনির্ভর আলোচনা করানি ঔহানেই নৃতত্ত্বর কামহান। নৃতত্ত্বর বিশেষ ডেঙ আহানর নাং সমাজ-সাংস্কৃতিক নৃবিদ্যা (Socio-cultural anthropology)। "Cultural anthropology is the facet of anthropology (man study) which describes and seeks, general understanding about human 'customs' or 'cultural behaviour'। কুনো জাত আহানর চারিত্রিক বৈশিষ্ট্য, ধর্মভাবনা, রীতি-নীতি, লেয়া-বেদ, গম-গমনেই, মূল্যবোধ, বিবর্তন, জীবনবোধ, জীবনসংগ্রাম-পুন্নাপক সংস্কৃতিহানরে চিনতে পাংলাক করের এ নৃবিদ্যা।

নৃতত্ত্বল য়ারি-পরি দিতে পইলাই কতহান মতবাদ বা তত্ত্ব (ism) হারপানি লাগের। যেমন - মানা (mana), সর্বপ্রাণবাদ (animatism), আত্মবাদ (animism), জ্ঞাতিপ্রতীক (Totem), গম-গমনেই (Taboos) বারো জাদুবিদ্যা (Magic)। এশিয়া, ইউরোপ, আফ্রিকা, আমেরিকা মহাদেশে জিনা পালয়া আসি মানুর সাংস্কৃতিক জাগরণ বারো বিকাশর নানান স্তরে 'ইজম' এহানির ভূমিকা চেইলমতহান। 'ইজম' এহানি চরিত্রর দিক দিয়া বিশ্বজনীন (Universal)। গোষ্ঠীবদ্ধ, সামাজিক মানুর জীবনচর্যার নানান বারা - মরণ-জরম, লুহং, তর্পণ, ধর্মভাবনা, জাতরমা গজ-তল প্রথা, জীবিকা বৈশিষ্ট্য- হাবি ক্ষেত্র মতবাদ (ism) এতা কামে লাগের। কুনো সমেইং আকসাটে। কুনো সমেইং খেইনা-খেইপক বা সিনা অয়া। নৃবিদ্যার গজে ভর করিয়া সংস্কৃতি বা লোকসংস্কৃতি চর্চার পথ এগ দেহুবাদিলাতা E.B.Tylor, J.G. Frazer, B. Malinowski, Herskovits, William R. Bascom, Stith Thompson-র সানে নাঙফিটা নৃবিজ্ঞানীয়ে।

আমার আলোচনার বিষয়হান বিষ্ণুপ্রিয়া মণিপুরী 'টোটেম'। লু-ক' মাতিক বুললে বিষ্ণুপ্রিয়া মণিপুরী সমাজ বারো সংস্কৃতিং 'টোটেম' তত্ত্বর প্রয়োগ কুন্সেই কুন্সেই অসে ঔহান বিসারানি। 'ফিল্ড বার্ক' (field work), ফিল্ড বার্কের পুলাকরা তথ্যর (collected information) তুলো আন্তর্জাতিক তত্ত্বরে মিলেয়া হমা এচুটি করেসি।

"A totem is generally an animal, more rarely a plant still more rarely a cosmic body of force like the sun or wind, which gives its name to a class and may be otherwise associated with it"। 'টোটেম' শব্দর অর্থহান অইলতাই জাতি বা জাতি প্রতীক। পৃথিবীর প্রায় হাবি দেশর পুরাকাহিনীং মানুর উৎসগরে অমানবিকরূপে কল্পনা করানি অসে বুলিয়া নৃ-বিজ্ঞানীয়ে মাততারা। ঔ অমানবিক উৎসগরে নিজর নিজর ফিরালে বংশ পরিচয়র চিনতহান করে দেহরানি অর। আদিম মানুরমা তানুর আপা-বপাগাসি কুনো প্রাণী, পশু বা বস্তুজ জরম অসি বুলিল বিশ্বাস আহান হঙসিল। কুনো পশু, প্রাণী বা বস্তু আগরে তানু তানুর গোষ্ঠী বা বংশর প্রতীক নিঙে সম্মান করতারা। এ বিশ্বাস এহানরে টোটেমিজম (totemism) বা জাতি-প্রতীকত্ব বুলানি অর। টোটেম সংস্কার এহান ইলয়া কোন পশু বা প্রাণীআগরে গোষ্ঠীর আদি প্রবর্তকগ বুলিয়া নিংকরানি অর পৃথিবীর হাবি ফামে। কুনো কুনোপেইত ফুল, ফল বা গাছরেও টোটেমরূপে নিংকরানির প্রথা চলে আহের থাইনাকার আমলেঙ। এসাদে করে বিশেষ প্রাণী আগর ধারা-নালা বা উত্তরপুরুষ বুলিয়া নিংকরতারা গোষ্ঠীআহানার মানুঙতাই নিজরমা আগই আগরে 'ওটোটোমান (Ototeman) বা 'নটোটেম' বা 'ওটোটোমা' বুলিয়া মনে করতারা। অর্থহান 'রকতর সম্পর্কর কাদার সাকেই' বা 'মোর সাকেই'। 'ওজিবা' (Ojibwa) বুলিয়া রেড ইণ্ডিয়ান মানু গোষ্ঠী আহানে পইলা 'টোটেম' বাহি এগর সৃষ্টি করেসি।

সর্বপ্রাণবাদ (Animatism) বারো আত্মবাদ (animism) মানব-বিজ্ঞানর লু ধারণা বা তত্ত্ব দুহান। আদিম মানুরে নিকাকার অভিজ্ঞতাংত হারপাসিলা যে প্রকৃতির হাবি জিনিস বা ঘটনার পিঠিত অলৌকিক শক্তি বা সম্ভা আহান আসে যেহানরে মান (mana) চেতনা বুলতারা। এ বিশ্বাস এহানরে ভর করিয়া সর্বপ্রাণবাদের ধারণাহান হঙইল। যেহানর মূল কথাহান প্রকৃতির হাবি বস্তুরমা প্রাণ আসে। এহানর লগে প্রাসঙ্গিকভাবে যবসিল আত্মার যারি। আত্মাএগই যে হাবি শক্তির উৎসগ বারো হাবি কর্মর নিয়ন্ত্রকগ এহান উপসি। যেহানরে আত্মবাদ (animism) বুলানি অসে। এ শক্তি এহানেই হাতে হাতে দৌভাবনাত পরিণত অসে। পিসেকার ভুরে আরাধ্য দৌ ঔতা মানুর দেহা-মং-মাজা-গঠন পেইলে পাহিয়া-পলি পশুরূপী টোটেম ঔতা তানুর বাহন অলইলা। দৌর বাহন বুলিয়া টোটেম ঔতা এবাকাও দৌর মর্যাদা পেয়া সালসি। বিষ্ণুপ্রিয়া মণিপুরীর আরাধ্য দৌ মহাদেবর

বাহনগ বন্ডাগ, বিষ্ণুর বাহনগ পশ্চাকার গড়ুর, দুর্গার সিংহগ, লক্ষ্মীর মাকু, সরস্বতীর আসগ, কার্তিকর ময়ূর, গণেশর উদুরগ।

পৃথিবীর প্রায় হাবি টোটেম কেন্দ্রিক সমাজে যে লেয়া-বেদ, আচার-আচরণ, বিশ্বাস-সংস্কার যুগ যুগ ধরিয়া চোরাছতগর ডেকি চলে আহের ঔতা একুশ শতকর সভ্য সমাজেও কিন্তু মাঙ নাশে। বিষ্ণুপ্রিয়া মণিপুরী সমাজে মরণ-জরম, লুহং, শ্রাদ্ধ, পিতৃ-তর্পণ, শ্রাদ্ধ, ভাত তাংকরানি, পিশুদান বারো বংশ পরিচয় দিতে গোত্র নাইলে নার। গোত্রর নাঙ থনির পিঠিত টোটেম সংক্রান্ত ইতিহাস লুকেয়া আসে। যেমন- মাগুরা মাছগন্ত মদুগল্য বা মৌদগল্য গোত্র, গুরুগন্ত গৌতম গোত্র, ডুলবি অর্থাৎ কশ্যপেস্ত কাশ্যপগোত্র, মাকু অর্থাৎ কুশিকেষ্ট কৌশিক গোত্র, পাহিয়ার বাঘ বা বাজ পাহিয়াগন্ত ভরদ্বাজ গোত্র সৃষ্টি অসে। পিসে পিসে ব্রাহ্মণীকরণ বা আর্ষীকরণ অনাই পাহিয়া-পলি, প্রাণীর নাঙ-সাং এতা সংস্কৃত অয়া মুনিষ্মি আকেইগির নাঙে বিবর্তিত অসে।

বিষ্ণুপ্রিয়া মণিপুরী পদবীহান 'সিংহ' প্রত্যক্ষভাবে পশুর নাঙে করানি অসে। বিদেশী পদবীর ক্ষেত্রে 'উলফ', 'ফক্স' ঔতা এসংস্কারেই জরম অসেতা।

অনেক সংগঠন বা ক্লাবর নাং পশুর নাঙে থনার প্রবণতা দেহিয়ার। যেমন হিংগালার 'সিংহ সংঘ' ক্লাব।

বিষ্ণুপ্রিয়া মণিপুরী রুহিবৃত্তির বারাদে মিলেং দিলে দেহিয়ার জাত এহানে চর্চা করতারা শাস্ত্রীয় বারো কুনো কুনো অশাস্ত্রীয় আজিকর এলার মেঠেলে টোটেম চেতনা বপয়া আসে। শাস্ত্রীয় এলার হাতগ সুর সা-রে-গা-মা-পা-ধা-নি ময়ূর, বন্ডা, ছাগল, বগা, কোকিল, গড়া বারো আন্তি—এসাদে পাহিয়া-পলি বারো পশুর রৌস্ত নিকুলেসে বুলিয়া নিংকরানি অর। অশাস্ত্রীয় আজিকর এলারমা কাঙর পালির এলাত যে দশাবতারহান দেনা অর ঔতারমা মৎস, কূর্ম, বরাহ, নৃসিংহ—এসাদে কতহান অবতার পশু বা প্রাণীর নাঙল থনি অসে।

বিষ্ণুপ্রিয়া মণিপুরী মানুষে জরমর খেলতামহান চানি বারো ভাগ্যবিচার করানিকা জ্যোতিষশাস্ত্রর রাশি-চিহ্নর পাংলাক লইতারা। রাশি-চিহ্নঔতারমা হাতহান—মেঘ, বৃষ, মীন, কর্কট, সিংহ, বৃশ্চিক, মকর—পশু বা প্রাণীর নাঙল থনা অসে।

গারির মাজা বারো বৈশিষ্ট্য ইলয়া মুনিরে চারিহান ভাগে ভাগ করেসে বাৎসায়ন গিরকে। বেয়াপারেও ইমে ঔসাদে। বিষ্ণুপ্রিয়া মণিপুরী মানুষে বাৎসায়নসূত্র এহান ঠাচা করিয়াই চলতে দেহিয়ার। এপেইত টোটেম ভাবনার ইঙ্গিত পেয়ার। শশ, গজ, বৃষ বারো হয়-মুনির এ ভাগ এহানিৎ উপয়ার এতা আসলে খরগোশ, আন্তি, বন্ডা বারো গড়ার লগে মিলহান দেহ্রাসেহান। বেয়াপার ক্ষেত্রেও পদ্মিনী, শঙ্খিনী, চিত্রিনী বারো হস্তিনী এতা থাম্পাল, মইবং, চিতাবাঘ বারো আন্তি রূপে কল্পনা করানি অসে।

এসাদে বিচার করলে আমি উপায় মানু এগ লৌশিংপা উন্নত আকখুলা জীবগ নাগৈ। মানু এগই চারিবারার প্রকৃতি পরিবেশর তুলো মান্না অয়া, একাঅ অয়া মানবসস্তাহানরে পুন্নাপ বারো সম্পূর্ণক অনুভব করে, উপলব্ধি করে। মানুর গোত্র পরিচয় বারো আন আন টোটেম পরিচিতি ঔতা প্রাণী বারো গাছ-বিবুকের তুলো যুক্ত অসেহান দেখলাং। এসাদেকরে মানু বারো প্রকৃতির বিতরে আশ্বিক সম্পর্ক আহান হঙয়া উঠেসে আদিম যুগেস্ত। সত্য এহান পাছরিয়ার আর সাং পথেদে অটিতে 'Save the plant, save the life,' Save the animal, save the environment' বুলিয়া সরকারি বিজ্ঞাপন আহিত পড়ের।

সিদ্ধু সভ্যতার মূদ্রাতৌ নানান প্রাণীর মূর্তি পাসি। ঔ সময়তৌ পশু এতা নিং শ্রদ্ধাল পূজা পাসি বুলিয়া গবেষকে মাততারা। এবাকার যুগে উবায়া আমি সা সা ক' দেহিয়ার সভ্যতার বিবর্তনর জটিল প্রক্রিয়া এহানাং টোটেমর ভূমিকাহান বাখান করিল মতহান। জ্ঞাতি, গোষ্ঠী, বংশর প্রতীক বা টোটেম আকজাত মানুঔতা আকতাই আকতার রক্তর সম্পর্কর কাদার সাকেই-কুটুম, ওটোটেমান, ন্টোটেম বা ওটোটেমা। টোটেম আকতা ঔসাদে মানুর বিতরে দুহান জিনিষ ঘটানি গমনেই- আহান অইলতাই পারম্পরিক রক্তপাত আরাক আহান অইলতাই আগই আগর লগে যৌন সম্পর্ক করানি। পৃথিবীর হাবিপেই টোটেম কেন্দ্রিক সমাজে এ গম-গমনেই (taboos) এহানি যাকরিয়া বা মানিয়া চলতারা। টোটেমরে ভর করিয়া যে যৌন ট্যাবু বা যৌনতা সম্পর্কিত গম-গমনেই হঙসিল ঔতার মাধ্যমে সেঙ রুচি খানি জরম অইল। এহানর ফলে আদিম পর্যায়ে যে ব্যভিচারে মানু উটা-পিটা অয়া থাইলা ঔতাস্ত হাতে হাতে দূরেই অনি অকরলা। মানু সভ্য অনা অকরলা। পালয়া জিংতা অয়া থানারকা নৈতিক মানদণ্ড কতহান হঙইল যেতাই সমাজর হচরাত মূল্যবোধ ঔতারে সংহত রূপ আহান দিল।

টোটেম এতারে মুঙে থয়া গম-গমনেইর ধারণা হঙনিয়ে মানুর সামাজিক ইতিহাসেউ পালা সিলকরিল ইঙ্গিত আহান দেখ্বা দিল। পরিণতিহান বিরাটভাবে মালেমহান জুরিয়া সিতারল। টোটেম আকতারমা যৌন সম্পর্ক হঙনি গমনেই বুলিয়া মানলা থাংতে খেই খেই টোটেম বা গোত্রত বা বংশত লুহঙর চলহান অনি অকরল। রক্তর সম্পর্কর সাকেই নাগৈ ঔজাত মানুর লগে লুহং অনি অকরল থাংতে হাতে হাতে খেই খেই টোটেমগোষ্ঠী কাদাত চেপনি অকরলা, কুটুম অইলা। ইচুদিন দ্বৈপায়ণ মানসিকতাল সিনা অয়া পরিয়া আসিলা মানবগোষ্ঠী ঔতাই হাতে হাতে ডাঙর সমাজ আহান হংকরানিত আগবেইলা। গোষ্ঠীস্ত ট্রাইব বা উপজাতি, ট্রাইবেস্ত জাতি বা ন্যাশন বা জাতিতন্ত্রর ধারণা হঙইল। এহানেই হাতে হাতে ইন্টারনেশনেল তন্ত্বে বিবর্তিত অইল।



পাংলাক পাসু লেরিক (Reference Books)

1. Ember, Ember, Peregrine, *Anthropology*
2. Tylor, E.B. *Primitive culture*
3. Morgan, Henry, *Ancient Society*
4. Freud, Sigmund, *Totem and Taboo*
5. Leach, Maria (ed), *The Standard Dictionary of Folklore Mythology and Legend*
6. Kessing, F.M., *Cultural Anthropology*
7. Islam, Mazharul, *Folklore : The pulse of the people.*
8. Dorson, R.M. (ed), *Folklore and Folklife, An Introduction*
9. Bascom, William R, *Contributions to Folkloristics*

Acknowledgement :

1. Central library, Assam (Central) University.
2. S.K. Roy College Library.

লেখাপা-পরিচিতি : গাউরাপা কবি বারো প্রাবন্ধিক। বর্তমানে এস.কে. রায় কলেজে বাংলা ভাষা বারো সাহিত্যর অধ্যাপকগ। গিরক বিষুপ্ৰিয়া মণিপুৰী রাইটার্স ফরামর প্রতিষ্ঠাতা সম্পাদকগ।

বাহি

দিল্‌স লক্ষ্মীন্দ্র সিংহ

তোর তুলো ইংচিকে মি টটরতৌ বুলিয়া
দ্বিয় আত, আহি দ'গ, দ'গ অট আদারেদে থউরি মেলিয়া
হাজেয়া থউরি বাহি মাঙর কুরাং
মাঙরগা বানানুংশি নাকায়্য মারাং।

বাহি

তুলতুলেয়া ডাঙর অ'র মোর জনমর সাদে
কনাকেন্ত মাতাছালা যৌবনে,
যৌবনেস্ত আয়া এরে লামলাকে

উবার আকপেইত

রিদিগর মাউসগত বারে বারে দিউরি ক্লিক
মনর পর্দাত বাহের বাহিগি, তলর রাঙা চিনহানিয়ে
বারে বারে দিতে থার লালর ইংগিত

সিস্টেমর কুনোপেইত হমার ভাইরাস
চারিবেদে সিলর যত মারানি, বম-ফাটানি
দাবানি, পিড়ানি।

বারো উতার চিকারি উতাই
পাগল ভাইরাস

তারো—

প্রতিগ বাহির মোর মাঙর সেঙহান
প্রতিগ বাহির মাঙর পাংকাল-কেঙহান
প্রতিগ বাহিয়ে মোর অর অর্থহীন
প্রতিগ বাহিয়ে মোরে দেহার লালর চিন।

বনর বিতরর কুনো আর্থ ঋষির সাদে
কাতকরে দিউরি মোর সেঙ আহি-পানি
ইংচিকে নলয়া মি করুরি হেইচা আহান :

মোর প্রেমর বাহিগিতে আলথক করে দেই
মোর বাহির সেঙ উহান নামাঙকরে দেই
মোর বাহি হাবিগির অর্থহানি থাক
মোর বাহি এতা সুপৌ লালনিত্তে নাক।□



মাতৃবন্দনা

বিমলেশ সিংহ

ধন্য ধন্য আসামর লাম,
এসাদে লামে জরম আমার
ধন্য আমি বিষ্ণুপ্রিয়া মণিপুরী।
এসাদে মাটিত কর্ম আমার,
লিংখাত ঐল ইমার ঠার
বিষ্ণুপ্রিয়া মণিপুরী ভাষা।
পাছর মণিপুরর হিন দুখর য়ারি,
নিংকরো হাবিয়ে
অসমী ইমার কীৰ্তনল।
এগহে আমার জ্ঞান লপুক,
এপেই আমার ভাতর চালুক,
আরাকৌ পালক ইমা অসমী
বিষ্ণুপ্রিয়া মণিপুরীর হম্মাল।
মণিপুরর মণিমুক্তা,
কপালে নেই আমারতা
হৃদিয়েঁপা জয়ধ্বনিল
অসমী ইমার লগে
পূজা দিক ইমা বিষ্ণুপ্রিয়া
মণিপুরী ভাষাহানরে।
অসমী ঠারর লগে
বিষ্ণুপ্রিয়া মণিপুরী ঠারর
য়াম নেই ব্যবধান,
নেই ব্যবধান আসামর জাতি
উপজাতির ঠারর লগে।
টটরানির সুরে হারপা পারিয়ার
আমি তানুরাংত দূরেইত নেয়ছি।
পূজা দিয়ার ইমা তোরে
চিস্তগ যওয়া লদিস ইমা
আমার লালচুম নাবিছারেয়া
হৃদিয়েঁপা নিংহান
কাৎকরুরি হাবিরাং
দলাদলি কৌলি গালি

ইমার ভজন পূজন

করিক হাবিহানে আকতায়
মুরে নানিয় ছানিক
মণিপুরর য়ারিল,
যেপেই থায়া যেপেইর হাবা ভাত
পেটে বরেয়া জিংতা অছি
ওপেইর গুণ-গান
লৌদিয়া গেইক
আহ হাবিহানে
যেপেইত থায়া খেয়া জীবন কাটেয়ার
নাম কীৰ্তন করিক ওপেইর লীলা খেলার
আমিও পালইক তানুর সাদে
ধরিয়া থইক আমার জাতর কলাকৃষ্টি
বৈষ্ণব ধর্মর সংস্কৃতিরে।
আম্মানৌ পালইতে ইমা
বিষ্ণুপ্রিয়া মণিপুরী ঠারহান □

এলা

(সুদেষ্ণা নিংসিং তর্পণ)

শশী কুমার সিংহ

অইক্ ধন্য আজি
এরে পুণ্য দিনে,
আহেদে বহেদে
হে সুদেষ্ণা তি।
হেইচা আমার
য়াকর যাকর,
ভক্তির আসন
অলংকৃত কর।
নিংসিং গাটর
এরে সভাঘর,
অক্ ধন্য আজি
মিঙালে তোর □

সেন্দা ৫-৪৫

কাঞ্চনবরণ সিংহ

হুকানা ডুঙ্গার বেড়হান লালয়া পিঠির দারিগত

চেকটিল মাদানপরহান

তিঙা ফুতি সরা দেনার পালাংগত

আয়া নামেরগা গাটর পারগর আদারহান

নিকাসি খাটাঙে বিবুলা মরকসিজার বাগা খাংহান

খবলশপাত পলাসেগা মথতা

কিংতাউ নাদেহিল সটন দিয়া উবা অয়া থাইতারা

সৌন্দর্য আহি মেলিয়া দেহিমক' বুলিয়া

সেন্দার জাঙআতমুরনেই সেয়াগর পিঠিত

আদারহান আয়া চেপরগা

ঔষ্যকা মুঙর পথগত প্রেমিক চেরৌ আগ বাসেয়া থার

ধূপর গংহানর তুল য়ারিপরি দেনারকা□

প্রেমর কলিজা

নরেন্দ্র ঠাকুর

মোর হুকানা কলিজা দিলু তোরে

তোর প্রেমর রসল ডাঙর ডিগল করিয়া তারে

বারো রুবাদিস মোর বুকে

হংকরিস সবুজ লপুকগ।

সোণালী অইতই আকদিন লপুকগ

উপেই বয়া রচেইস

সোণালী হপন

আগর দিনর।

তোর প্রেমর রসভরা পরশে

থম থম করিয়া জিংতা অইতই লপুকগ

মি বিলীন অয়া থানা মনাউরি

প্রেম বারো আশার অন্তহীন আকাশে।□

মাধুকরীত

রামলাল সিংহ

মাধুকরীত সালছু আজি

মাঙগেছেগা হাবি নাপালঙ

কিহানে হঠাৎ

হারনেই।

হৃদিবীণাগর তারে তারে

অরেরতা কিয়া আজি

দেশী, দেবগিরি, বরাতী, টোড়ী

ললিতা বারো হিন্দোলী?

ঠইগ, মোর ঠইগ তি;

কিসাদেতে মান্ডু তোরাং

ভিক্ষাং দেহি

বৌনেই।□

ইমার চরণে

রামেন্দু সিংহ

ইমা কাতকরলু মোর ঠই হাতগি,
কাতকরলু মোর রকত ইমার নিঙে।
তেবও জিংতা করে নুবারলু ইমা,
মানুর মিমাঙে নুবারলু তুলানি,
ক্ষমা ভিক্ষা মাগৌরি ইমার চরণে॥
ইমা কাতকরলু মোর ঠই হাতগি,
আশাই আশাই দিন কাটেইলে।
আশা পুরা নুবারলু ইমার পুমিঙে,
ক্ষমা ভিক্ষা মাগৌরি ইমার চরণে॥
ইমার আশার ঋণে বুরিয়া থাইলু,
আশার ঋণ ছজে নুবারলু,
ইমা কাতকরলু মোর ঠই হাতগি।
জনম জনমে জরম অইংগা
ইমার গর্ভসাগরে,
ইহ জনমে নুবারলু পুরানি,
পর জনমে পুরেইং ইমা;
আশার সাগরে জরম অয়া॥
ইমা কাতকরলু মোর ঠই হাতগি,
কাতকরলু মোর রকত ইমার নিঙে।
তেবও জিংতা করে নুবারলু ইমা,
তুলানি নুবারলু মানুর মিমাঙে,
ক্ষমা ভিক্ষা মাগৌরি ইমার চরণে॥□

শরৎ

সুজিৎ সিংহ

কাল মেঘর হাগর ধুমেল
চিকচিকি রৈদর তেকতেকা উমাহিজা,
ইনচিক চিকসি
শরতর কঙালা লিরি বৌর ইঙে।
আসাংপা লপুবর মাটিরা সাকা
গাত টেকা হাবি অসি মাম্মা
ইশাং মচুর ইরুফি পিদিয়া
নুবা কইনার আহানিয়ে।
শিঙারেইর বিবুলা হারৌএ
কালচিঙির অচেতন ঘুমে
উঠেইরি মরে
শিঙারেই নুংশিপীয়ে।
শরতর খিকরা খুবার পানিয়ে
শিঙারেই জঙানির গজে
শিঙারেইরে করেসে হারৌ
বিয়ান বেলির লেহাওর মিঙালে
খুবার ফুটার লিকলিকা জলকানিয়ে
দুকগাসেউ ডাহের মরে
আইনে তিয়ৌ শরৎ আহেসে।□



মোর গিরক খালপালিয়া

ব্রজগোপাল সিংহ

কপালখিপি ইমার জিলক, আকগ বুলতে আকগ
বাবার অধীনে থানার পিসেস্ত বানা পাসিলা নিঙল সৌগ।।
বাবার যাথাঙে ঘরৌ পাতলু হবা পাত্র পেয়া,
কাদিয়া রহিয়া বিদায় আইলু দারিগ লামিয়া।।
ঘর পাতানি কইনা অনি আজি হারপেইলু,
হেইরে বানানুংশি দিতে, হেটক অনাত পইলু।।
কিজাত পাত্র সিদা সাদা বানার ঠইগ পারা,
বিতরি কৌলি সেধুরি করের ক্রিকেটারগ পারা।।
মোরে খালপাল করের তা, রাশিহান হবা বুলিয়া,
দুবার গাটিয়া থর হামেসা, রাহের লুমকরিয়া।।
হাদিত মাতের তা মোরে মি কিমেতা,
মি মাতুরি কতিউ হবা, নেই তোর ডেকিতা,
উহান মাতলে দেব মুন্নি, তেরা খালপালিয়া
পথর মানু চানা নাদের, তা চার পলেয়া।।
হাদিত বাইরে যারগা উপেইত সময় আহান পাউরি
আহের আকতা দিতই খনতা হুদা ডরাউরি।
কাদাত আহিয়া মোরে মাতের, কুরাং ফোন করুরি।।
কিসাদে থাইতু মোর প্রভু চিধুকি খেলার ঘরে,
আকখুলাগই পলেয়া থার নাদেহিমতা করে।।
সংসার করাত কুরাং আইলু দৌ নিংকরিয়া
জীবন এহান থানাত পইলু, খাটালগত হমেয়া।।□



ইঙাল ঙালক স্নিগ্ধা সিংহ

কনাকে ইমা যে ঠারল আমারে
হিকেইলে কাকেইহান আতে ধরে ধরে,
ঔ কঙালা নুংগিপা ঠারহান
নাপেয়া আটতে লেইলেক অর জাংহান।
একবিংশ শতাব্দিত হনিয়া তোর ডাক
পাছরাং ওকরানির ইমার মস্তহান,
এদিন হাবি লেইরা করলে হাংতে
নাপেয়ার তোরে হাজানির ফিজেত চেইতে।
গারির ঘাম বেলেয়া পূর্বপুরুষ আকদিন
কৃষ্টি কলাল ঙাল করেসি জাতহান,
বিদ্যা, বুদ্ধি, পাঞ্চালল অইলেও সবল
ইমার উমহান নাপেয়াতে অছি দুর্বল।
আজি ইমা তি আহিগ মেলতে
সমাজ কল্যাণ জ্ঞান হারাসি জিপুতে,
তাম্বা, তাম্বি, জিঙা জিঙিল অইলাং পাগল
আগ দুগর সমাজ বুলিয়া নাকরিক ভুল।
স্নেহময়ী ইমা তি বানাপাদে আমারে
কলকরিয়া উড়কে লদে, হাবিরে,
হিকাদে কাকেইহান বারো আতে ধরে ধরে
চুময়া জাংহানি বেলানির জ্ঞানদে আমারে।

চিত্রাঙ্গদার জিপুত বারো ক্ষত্রিয় সন্তান
থ পারিক আমার ঔ বংশর গৌরবহান,
আশীর্বাদ দে ইমা আজির মেইঙালে
ইঙাল ঙালকরিক জাতহান তোর পাঞ্চালে।□



ষোল্ল মার্চ

সন্তোষ সিংহ

This is not a story to pass on- Tony Morrison

ধর্ম অধর্ম পাপ পুণ্য এবাকাও আসে
আসে থাচির আদার, পুর্নিমার মিঙাল
গঙালার সিঙারেইর গতে এবুজো ধরাতল
মধ্যবিস্ত্র শ্রম পুষ্টিপালর বরণে বরণে
আমারে সন্ধ্যা থার এবাকাও নিত্য কৌমচিহ্ন
নেই ছা তোর কুনো যাপনচিহ্ন।

প্রতিবাদী নারর সামাজিক মিছিল
অধিকার কারলনির বাশাক সূর্যবুকে
এসাদে অংতাং যেহান অর—
রাষ্ট্রসম্মান তানুর মুণ্ডে ছদ্মফিজেতে
বুলেট... রেললাইন... কলিজার তাজা রাঙা রকত...
ইমারে বানাপানির অপরাধে, হায়, মরণ-খুন্দল।

ইমারে বানাপানির অপরাধে
কাল বনবুদি মরণজঙ্গিয়ে
কলকরল যে নীলঠাইগরে
ও সেয়াঠাইগ
মৃত্যুগুম আলোকবর্ষ লালয়া
বসরহান লেহে আইরি
পৃথিবীর অকৃতজ্ঞ গুমহান
বাগানিং বুলিয়া।□

নুঙেই বিসারেয়া
হরেশ্বর সিংহ

মোর বুকগং সুমুদ্রর আকাল
আকালে কারলয়া নেরগা
মেরাকেউ বুকগর ফাল,
আকালর থেংনাং বাহিয়েউ কারিয়া
থয়া আইতারা তানুর নিকাকার ফিরে।

ওরি মি নিঠার,
ডিগল গাড়িহান চলতে থার
তার নিজর রৌহানল।

নুঙেই বিসারেয়া মি বুলিয়া
থাউরি
কুরাংত কুম্পেই।□



হপন

মৃণাল কান্তি সিংহ

আহানির হপন মি দেহেসিলু
আহানি নুবারলু।
যেবাকা কাদানির হপন দেহেসিলু
উবাকা কাদানিরো নুবারলু।
চংদানি-দাপদানির দেহেসিলু মি হপন,
নিংসাহান আটকেসিল উবাকা।
দেহেসিলু মি এলাদেনার হপন,
বাগিল নারগ উপেইত।
যেবাকা হপন দেহেসিলু নাসানির,
বুকগত আতহান উবাকা বাদেদিলা।
হপন দেহেসিলু মি পাকরানির,
নাকরল গারিগই উপেইত।
মনাসিলু গুমর হাদিত হপন দেহানির
হজাক অইলু উবাকা গুমেস্ত।
হপনর পিঠিত পরিয়া বাহা অয়া পরলু
অয়া থাইল মোরাং হপনেই হপনাতিং।□

হমাদিয়ার তোরে

বীরেশ রঞ্জন সিংহ

হমা দিয়ার হমা দিয়ার
পৃথিবী ইমা তোরে
কত যুগ ধরিয়া তোর বুকে
কলকরিয়া থসৎ
কত মানু কত বিরুদ্ধ
কত জন্তু পাহিয়ার
হমা দিয়ার তোরে।

তোর বুকে আইলা গেলাগা
কত জাতর মানু
কতির জীব পাহিয়া
হাকি ইতিহাসে নেই লিখা
কিন্তু সাক্ষী আসত তি
হমা দিয়ার তোরে

দুঃখ লাগের যেদিন
তোর অঙ্গ ক্ষত-বিক্ষত করলা
আনবিক বোমা ফাটেয়া
হিংসুক লোভী রাজ্যাভিলাসী মানুবে
নাক নাক উসাদে তোর অঙ্গ হানি
ইমা পৃথিবী।
আহ হাকি মনুষ্য জাতি
কালকরিক এ প্রলয়েন্ত ইমা পৃথিবীরে
হমা দিয়ার তোরে।□

ছরকাং খুল্লি বনক সৌ
ননীগোপাল সিংহ

ছরকাং খুল্লি বনক সৌ
তি মোর রিদির হারৌ
জুনাকে দেহিয়া বেলিয়ে দেহিয়া
বানাপেইলা তোরে কতিয়ৌ।

তি নাই মোর রিদির খৌরাং
তি মোর টেইপাং
তোরে কাদাত পেয়া
বলিপাংকাল অইলাং

তি খুল্লিগ অইলে জিলকগ পারা
জেঠিগ অইলে মালকগ পারা
তোর বানানুংশি পেয়া
লালৈতাঙাই টেঙারা-চিংখেই

তি জরম অয়া গাঙর ঠইগ অইলে
ডাঙর অয়া ইমার আহির পানি পুসলে
ঝালি রাণীর ঠৌনা তি
সুদেবগ নাং পেইলে

তি লক্ষ্মী, তি সরস্বতী তি ইমা সতী
চা আজি ইমাই ডাহিরি পাংকাল ঠুময়া
হাবির লগে থাইস তি

তুমি পুলয়া, কলমগরে আতিয়ার করিয়া
জিংতাঙাই হাবির মন
লালফাম অইতৈ প্রেম বিলেয়া
ছরকাং খুল্লি বনক সৌ
তি মোর রিদির হারৌ। □



গঙ্গাল শহর

সঞ্জীব সিংহ

হে শহর তি অসত কতি গৈগ।
বেলিহান নুকুলতেই
দপ দপ করিয়া দাপদিতাই
দিনহান অইতেই তোর পথে
গড় গড় করিয়া রহিতই কত গাড়ী,
তোর বুকে গুম গুম করিয়া
চলতৈ কত যে মেশিন।
হে শহর তি অসত কতি গৈগ।

তোর পদ পথে কত যে কাদানি,
কত যে আত পাতানি
তোর পথে ভি.আই.পির বাজের সাহিরন
কত মানুর হায় হায়। কতিরৌ কান্দন।
হে শহর তি অসত কতি গৈগ।

বরনর দিনে তোর পথে
সুইমিং পুল হংকরতাই,
মানু, গাড়ী-ঘোড়া
হাকিয়ে হাতুরতাই
তোর নাঙে কতিল গুণ গুণেইতাই।
হে শহর তি অসত কতি গৈগ।

রইদহান দিতে তোর গালগ ফাটেয়া
করতাই তোর শীত-তাপ নিয়ন্ত্রণ
কত যে কলনা, কত যে জলনা
করতাই তোর বুকগত কত যে নিয়ন্ত্রণ
হে শহর তি অসত কতি গৈগ।

সেন্দায় আরতি, বোতলে বর্তি
জালেইতাই কত যে কিতা
রং বেরঙর গাড়ী চলতৈ
বেলতাই তোর পথে ভিক্ষারীর দেহ
চলতৈ কত হনন কাণ্ড

অইতৈ হাকি লণ্ড-ভণ্ড।
হে শহর তি অসত কতি গৈগ।
রাতির জোনাকে অইতাই বিভোর
খেলতাই নিদ্রা ইমার বুক
যিতাইগা কনাকে
এহানতে হারনেই, সৃষ্টির নিয়মে
অইতৈ পুনর জরম, কবার ডাকে
হে শহর তি অসত কতি গৈগ।□

সুপ্তা

সমর সিংহ

খাংতা করে
কাজলি আহির
কেথকপা তর, বেকাদে চানা
চেইতে কতিরৌ কুপতা।

দিন জ্বিলকানির
পেইরাকে তি
কঙালা মুকসির খুচাবিল;
মিক্সিং দিলে যেবাকা
আকতা।

নুবা শরতর,
খুবার ফুটাই
দেখলু যেমন লিকলিকা তর
আহির কুনে মুকতা।

চিনলু তরে,
ফাগুন মাহার
আশার ঠুমেই জিংতা অনির
কুরিগ তি- সুপ্তা।□

নিংশিঙে আজি

বিশ্বপ্রসাদ সিংহ

খাংতাক মেংসেলহান চেইতে,
যৌবনর দ্বি প্রহর, মাতামবালা বেলিটিক।
পেইরাক নিংশিঙে মোর, কনাকর মেল,
জীবনর পইলাকার প্রহর, হারৌপা দিন।
ঝর্নার সাদানে তেতনেই ধারা,
জারর পরকার লিকলিকা বৈরাকর পানি,
নুবা বেলির মিঙাল, খুবার পানি,
গাছর পাতায় পাতায়।
লপুकर গোরু-মইসর পাল, রাহেকুরা রাখাল
জমিদারর ডাঙর-ডিগল বারিহান।
ফলর বাগান— ফুলর বাগান, হৌ-পাতর খেতি।
জমিদার বাবুর বৈঠপগ, হবা হবানেই মানু পুলসি
কতি য়ারি পরি হৌপনহান দেখরি পারা।
সেন্দা আরতিত, খাংতাক পাহিয়ার রহন, টেইপাঙে মি
খাং লাগিয়া দিশাহারা।
উবাকার সেনারেই ফুল, এবাকা রজনীগন্ধা,
তঙাল-তঙাল মানু, উরণ-পিঙ্কন সাজেলে,
মাতামর রৌ।
আসিল যেতা মোরতা, মানুর মিঙালে,
নিংশিঙে আহিলে, হারৌ পিয়ম হিন-দুখ
আকসাটে হাবি হৃদির কোণে।
বেলির মিঙাল, বরণর চাকগর আধারে।
আজিকার দিনে গেলগা দিন বিসারতে,
পরলে পরল আহানরে আহানে জাপদিয়া,
স্মৃতির মারলে।
গেসেগা কততা হৃদিগন্ত মুছিয়া লেহাজোখা নেই,
হারৌ পিয়ম, হিন দুখর য়ারি,
আহিল নিংশিঙে, নুবা যৌবনর পইলাকার কাকেই
হৃদিগত প্রেমর মিঙাল, বানার হুতগ।
টেইপাঙে আজি, মিকুপে আকসাটে
থাংনা থাংনি স্মৃতির মারল, সাগরর ডেউ
বারিষার বৌ বরণে □



ইমা বিষ্ণুপ্রিয়া

লেহাউ সেনা সিংহ

হে ইমা বিষ্ণুপ্রিয়া

আতহানি সালকরিয়া তোরাং মাগিয়ার ভিক্ষা

হিনপেইলউ পেটগ বুজাদে

ডেইডেইহারা দিতারা তোর জিপুতরে।

আজি সংসারে নেয়সে তোর জিপুতর জাগা

যাগা আহিগি খুলিয়া হবাকরে চাগা,

মানুর দুবারে দুবারে বেসতারা নিজরে

যেসাদে ফেরিআলাগ বুলেরগা ঘরে ঘরে।

আর কইদিন আমি এসাদে করতাঙাই সহ্য

নুবারতাঙাই এ কঠিন ধৈর্য,

পালনেই নৌগ অর যেসাদে

তোর জিপুতর অবস্থা অসে উসাদে।

আজি পদে পদে আমার অর বেইজ্জত

খালকরিয়া নাপেয়ার কুনো পথ।

যেসাদে মাঝু গিরকে দিনে খার ঠুঙ্কর

পেয়ার ঔসাদে আমি পদে পদে টঙ্কর।

ইমা আর থইতেই কইদিন আমারে এসাদে...

লাটগ অয়া পরিয়া আসে রাজস্থানর মরুভূমিগর সাদে,

মনুষ্য অয়াউ আমি হাবি অইলাং অকর্মণ্য

যেতারকা সংসারে আমার নেয়সে কুনো গণ্য।

আজি দেশ দেশর যত সন্তান

অসি হাবি আমি বাদে জ্ঞানী গুণবান

আমি ছদ্দা থাইলাং তলয়া

বেলি রাজার মিঙালহানাত আমি লেমগ অয়া।□



বিশুণ্ণিয়া মণিপুরী ঠাৰ

বারো

সাহিত্যৰে মিমাঙে কাকৰানিৰ ৰাশাকল

বিশুণ্ণিয়া মণিপুরী ৰাইটাৰ্স ফৰামে

কাৰেসে ঐতিহাসিক কাকেই এহানৰে

থাকাৎ জানাউরি।

কাৰ্তিকসেনা সিংহ

বিধায়ক

অসম বিধান সভা, পাথারকান্দি সমষ্টি।



বিশ্বপ্ৰিয়া মণিপুৰী ৱাইটাৰ্স ফ'ৰামৰ লক্ষ্য বাৰো উদ্দেশ্য :-

- ⇒ বিশ্বপ্ৰিয়া মণিপুৰী ভাষা-সাহিত্য, শিল্প-কলা, ইতিহাস, ৰুহি-বৃত্তিৰ গজে সময়ে সময়ে সেমিনাৰ, কৰ্মশালা, সিম্পোজিয়াম হাজ্জানি।
- ⇒ বিশ্বপ্ৰিয়া মণিপুৰী লোক সাহিত্য বাৰো লোক সংস্কৃতি যত্নৱানি।
- ⇒ ভাষা-সাহিত্যৰ অনুবাদৰ কৰ্মশালা হাজ্জানি।
- ⇒ সময়ে সময়ে পত্ৰ-পত্ৰিকা, জাৰ্নাল, নিউজলেটাৰ, সাহিত্য সংগ্ৰহ ফংকৱানি।
- ⇒ নেপালকেইৱে বাৰো শিল্পীৱে বসৱহানলেহে খবুল আকেইহানল সন্মান দেনি।
- ⇒ বিশ্বপ্ৰিয়া মণিপুৰী সাহিত্য ইংৰেজি বাৰো ভাৰতীয় ঠাৱে অনুবাদ কৱানি।
- ⇒ বিশ্বপ্ৰিয়া মণিপুৰী শব্দকোষৰ লেইত্ৰেং কৱানি।
- ⇒ সৃষ্টিশীল ইকৰা বাৰো শিল্পকৰ্মৰে ইথেই যোগানি।
- ⇒ কলাক লেঙৰমা ইমাঠাৱে ইকৱানি বাৰো টটৱানিৰকা খৌতাল দেনি।
- ⇒ বহুভাষিক অভিধানৰ লেইত্ৰেং কৱানি।

Bishnupriya Manipuri Writers' Forum

Visit us : www.bishnupriyamanipuri.com



